

九

梅

村

詩

集

九梅村詩集卷十六

鐵嶺魏燮均公隱甫編

餘生草

己巳  
庚午

宛平劉 杞松雲選訂

上元夜步溪上憶甘泉蕉園二君

念昔上元夜同來溪上望月圓又今夕人別各他鄉  
荏苒歲何速飄淪髮更蒼遙知動離感獨立亦蒼茫

古鏡篇

去年夏有農夫楊某犁田於西山之麓得古鏡  
一枚大可三寸許背有隸書寶鑑二字左曰玉  
帶金魚右曰壽山福海皆楷書字體端正鏡質

亦完不知何代物也余索之楊慨然以贈遂藏  
以爲寶玩焉因賦一詩

液金神物希今古石爛水枯堅不腐風塵黯澹世無光  
豈肯終埋在泥土去年老農耕山陲拾得古鏡圓如規  
背有寶鑑兩行字不知何代何人遺策藜我適巡阡陌  
老農弄之不甚惜目非識寶當頑銅那似胡兒眼光碧  
慷慨持以笑贈余如得珊瑚之拱璧土花鏽綠晦晶瑩  
中有古人顏色積滄桑迭變陵谷更至今完質無虧形  
或疑王獻失千載羸其罍或疑贈王度汾陰遇侯生當  
年鑄者非尹壽合是呂暉師曠良工成什襲不敢令人

見恐隨赤衣道士龍宮行擬塗金膏拭珠粉自應滌垢  
復光明且置山齋伴十硯照我窮愁著述如虞卿碧金  
仙敬元穎壽光先生名金炯漢家有鑑十二辰貴比飛  
精與倒影容城侯光音王圭珠砥孟相低昂更有能照  
前生之形狀能照千里之凶祥紫珍照人病皆愈青金  
照鬼形難藏一例俱稱希世寶曾昭精鑑懸靈光吁嗟  
乎寶物在世本難得亦須慧眼有人識縱能與月共爭  
輝伊誰懷之貢王國徒令珍藏任仲宣獨照男兒可憐  
色鏡兮鏡兮汝雖出世不逢時依舊韜光類土蝕

同商文瀾登龍首山寺值山月上人病中

山僧癯且老病倒坐禪身口噤不談佛目開猶識人殘  
經散堆案破衲疊生塵尙指蒲團坐無言意更親

山齋遣興

自愛恬吟養性靈避他俗客戶常扃多愁未免人皆笑  
眾醉何堪我獨醒細檢鄭遨續酒譜偶繙周絳補茶經  
閑懷又覺殊無賴且製山齋十硯銘

哭山月

不道維摩病眞成斷世緣此身疑入定何處去參禪遺  
偈語難解問醫方不傳無生歸寂滅誰引謁西天

歸途卽事

路轉出崖口微聞人語喧  
陡田懸嶺背窄道貼巖根  
溪旱淺餘水樹深孤有村  
居民不相識策馬過柴門

得甘泉書奉懷卻寄

時客游牛莊

故人遊海上念我寄書來  
一別苦相憶三年殊未回  
世皆稱畫史天欲老詩才  
莫爲窮途泣知登般若臺

枕上自述三絕

堂上多年沒老親弟兄分  
爨贍孤身眼前雖看兒孫好  
惟有山妻是舊人

我父憐兒教讀書欲期光大此門閭  
那知科第生無分  
終老田園守敝廬

九  
我已無能望我兒我兒豚犬更庸癡無聊且盼諸孫大  
要勝而翁乃祖時

雨夜不寐

天色黑黃昏孤村早閉門風驅山雨至雲送夜雷奔水  
鳥叫溪上秋蟲啼草根卧聽終不寐起坐倚前軒

秋眺書事

山色四圍碧蒼然含遠秋片雲過嶺滅曲水出村流路  
斷不通馬田荒宜放牛今年苦霖雨翻動老農愁

夢任蓍園先生

先生去不返泉路絕音書昨夜忽成夢歸魂來視余話

知死別後哭到醒時餘枕畔猶垂淚松風淒我廬

饑歲四首

如斯饑饉歲到老未經過地溼恐霜早天陰愁雨多已  
嗟無夏麥況復損秋禾更爲明年計窮黎當若何

閭閻太艱食從未似今年糴米愈增價典衣偏少錢富  
農無積粟貧婦斷炊煙最怕親朋至艱難備酒筵

每飯縱啜粥已知節儉遲衣當典盡日米到買空時諸  
戚難求貸全家竟忍飢愁聽小兒女哭索阿娘炊

去年經雨潦尙有半收成合境猶無食而今況少晴歲  
荒防起盜民苦患過兵誰感皇天意垂憐活眾生



山行道中

隨山逐流水路曲任東西  
亂石崩輪鐵淤沙滯馬蹄  
峯迴初見樹村僻不聞雞  
知有幽棲者多應厭鼓鼙

銀岡書院秋夜

小院黑無月見星天已晴  
地寒因雨氣樹響借風聲  
夜柝猶聞巷秋鐘不出城  
孤懷正蕭索難遣此時情

中秋大雨至暮始晴喜見月

中秋終日雨涼雨帶秋聲  
直到夕陽沒始看天色晴  
殘雲分段滅好月洗光清  
不肯虛良夜孤吟到三更

雨夜憶甘泉

秋風最蕭瑟吹雨夜深來新雁正南度故人應北回他鄉黃葉落孤館黑雲頽竟夕燈前坐遙知意獨哀

八月二十三日雨中書事

燭地徧成赤黑雲黃復紅天疑燒夕照雷忽破遙空疾送隔山雨狂來號樹風驚人太奇絕誰敢問天公

自前村夜歸

月黑辨村路歸來知舊途星光照水亂燈火出林孤天遠霜鴻度山昏鬼鳥呼到家門未掩纔罷晚餐厨

村居秋夜

鄰窗上燈火比戶掩柴扉夜靜犬聲遠秋寒蟲語稀流

星墮池樹涼月在人衣獨立驚霜信遙空一雁飛

書院暮秋

秋色滿庭宇軒窗淨點埃樹根風落葉石縫雨生苔  
階冷斷蛩語天高聞雁來故人時過訪門徑總常開

贈鄭乙黎

客子生涯太寂寥窮途阮籍有誰招空廊敗竈無煙火

自掃秋風落葉燒

時寓書院東廊

秋暮出城夜歸山莊

暮天涼雨過出郭片雲無日落鴈橫浦月明人在途  
秋星動斜漢野火逗寒蕪行近聞山大輕車且緩驅

夜坐書懷偶憶亡友王拓園

對酒獨無趣，寥然夜坐深。  
孤燈聽葉落，一客和蟲吟。  
老態先欺鬢，窮愁總到心。  
亦知鍾子去，不忍碎牙琴。

暮秋題山莊

日領煙霞自閉關，一渠流水響潺湲。  
碧雲歸壑曙分野，紅葉對門秋滿山。  
初靖兵戈連歲擾，自安雞犬數家閑。  
誰知空谷耕桑地，有個詩人在此閒。

夜起

疎林風葉響，疑是雨聲來。  
地白月初上，天青雲已開。  
睡鴨棲樹杪，病犬卧牆隈。  
獨啟中庭望，秋心亦鬱哉。

九月十六日既雨復大雪終日對酒率書愁懷

九月十五陰雲橫夜半瀟瀟聽雨聲  
明朝雲鬱雨未止半晌不見天光晴  
颼颼西北秋風起雨點隨風打窗紙  
忽作漫天雪片飛雪兼雨落都成水  
紛紛積久半消存雪綴茅檐失小村  
紅葉滿山皆變白玉峯瑤樹爭當門  
門前泥淖深盈尺可惜難來不速客  
自開家釀爲澆愁痛飲連浮幾大白  
濁酒澆愁愁不開對雪更念荒年災  
今年霍雨損禾稼米珠薪桂窮黎哀  
哀鴻嗷嗷聽不得飢餓半月無人色  
況加天氣早寒來兒女無衣婦停織  
我亦有累妻孥孫一家九口食指繁  
歲收僅足給溫飽

凍餒尙免啼號喧嗟乎天爲破格賜庸福憐我詩人異  
流俗念此興豪飲更酣醉後不知雪壓屋

閑居書懷

謝卻塵勞早息機遁居空谷足音稀自歌白雪無人和  
不羨青雲有鳥飛到眼曇花空卽色回頭春夢是耶非  
耳邊厭聽激昂事我欲稱尊學杜微

百年人壽幾何時轉恨吾生亦有涯不見甯封到沙海  
欲尋韓稚問泥離神蛾合藥終無分丹雀銜禾未有期  
安得尸羅傳異術能將老叟變嬰兒

六根擾擾六塵餘結習於今尙未除亦願有情生淨土

已知無夢到華胥求丹欲寫黃庭讀聽法須皈白社居

莫謂吾宗傳道少生公佛論伯陽書

道生法師本魏氏著佛性常有論魏

伯陽著參

同契道書

苦海茫茫莫問津回頭是岸有何人求仙難換今生骨  
成佛還修宿世因且把餘年聽造物休將直道愧斯民  
若能立節全忠孝萬劫常留不壞身

雜述排悶六首

老興頽唐意氣平自家拈筆述平生文章濟困知無用  
親友通財覺寡情年少光陰回首悞運乖名利累心輕  
從今且作埋頭計敢望公車聘衛衡

我是梅花舊主人  
鈍根不復憶前身  
聰明預祝來生福  
果報難知後世因  
若有聲名何必貴  
但無凍餒不妨貧  
妄心今已銷磨久  
惟愛高風說法真

念昔曾罹煩惱緣  
餘生歲月老青氈  
病經垂死翻逃劫  
詩未編完更假年  
割產莫償親友債  
買書權作子孫田  
平居偶爾捫心憶  
愁煞狂吟魏仲先

幕府歸來隱舊林  
躬耕未肯負光陰  
著書豈爲傳名計  
養子聊安送老心  
人事交侵催白髮  
世情偏好重黃金  
孤懷落落難諧俗  
莊舄依然作越吟

入世難求出世方  
浮沈人海亦尋常  
壯游山水猶能說



舊讀詩書已健忘枕石但期容我逸嫁衣翻悔爲人忙  
況無兒女婚姻累底事因循學向長

途窮漸入奈何天智慧無多呈礙全荒歲子孫成贅物  
衰年妻妾是虛員但憑老鏡明雙目尙覺輕裘壓兩肩  
安得專心修淨業此身強健奉金仙

寄王麋棠少尉

星分雲散各天涯兩地飛書慰別離每寄新詩懷魏樸  
忽彈老淚哭任熙

寄示哭任  
著園詩

回頭應有滄桑感過眼都

成夢幻思更勸加餐須努力與君強健百年期

霖雨無情損麥禾閭閻艱苦病催科邑搜富賈糧儲少

村有窮黎菜色多官懦養癰滋盜賊民虛喪膽見兵戈  
不逢李峴循良吏誰念蒼生切瘡痍

迭經饑歲更凶年難保流離慶瓦全庸吏救荒無善政  
頑民入盜有威權向遭塗炭猶云幸再見瘡痍倍可憐

我是書生無寸柄請兵籌策縣官前

時盜賊充斥滋擾鄉閭余與諸紳士

具呈請兵以資彈壓官許之

自傷垂老一無成慚愧終軍早請纓徒令英雄悲末路  
敢將富貴望他生韓蘇文擅千秋業衛霍勳垂曠代名  
自笑樗庸少材略龍鍾徒有氣縱橫

冬日曉行

初日冷光照荒雞  
噤不啼葉乾懸凍樹  
冰裂響寒溪隴  
雪通人跡隄霜滑  
馬蹄前村有煙火  
飛出短林西

冬日曉起

凍雀噪檐際  
朝炊尙掩門  
日高霜落樹  
風疾雪迴村  
破閣開書帙  
消寒倒酒樽  
暮年尤怯冷  
堅坐擁爐溫

除夕袁楚帆

中江

留余家度歲  
因憶其尊甫甘泉

作此示之

今夕欣逢汝  
因之念爾翁  
與誰共守歲  
到老尙飄蓬  
鴻爪三年別  
鄉心兩處同

甘泉時寓潘陽

明春捧歸杖  
慎勿滯遼東

庚午

哭王蕉園十首

東風吹淚灑銀州又惹山翁哭舊游  
病到瀕危剛十日死成永別竟千秋  
長爲異地人偏老卽作重泉鬼亦愁  
久已無家任飄泊仲宣從此罷登樓

雞壇香火了前因尙幸餘緣半面存  
見我傷心猶有淚聽人問病已無言  
早知故友能埋骨更有門生解報恩  
余與文瀾趙靜湘爲之營葬其門人  
吳五樓吳寶賢叔姪輩爲之市棺木  
君在九原應瞑目不須風雨泣孤魂

三度遼東此度長廿年人事變滄桑  
漸看朋輩歸新壟

早聽妻孥殉故鄉

辛酉賊犯萊州高密大亂妻  
林氏罵賊遇害子亦見殺

愁到無

聊歌代哭老來失意醉猶狂況兼貧病終難遣鬱鬱催  
成兩鬢霜

平生嗜酒與吟詩到老依然性不移病似蘇微猶懶戒  
窮於杜甫每徒悲自彈古調無人和獨賞元音許我知  
曾記少年初把臂卽將文字訂心期

三十餘年共苦吟箇中滋味互追尋與君同好性情合  
從此知交肝膽深吐屬況兼才子氣推敲直到古人心  
鍾期不料身先死竟使牙生欲碎琴

旣耽風雅復多情底事窮途困步兵果報本難論宿業  
因緣猶自祝來生亦知我輩原無福幸是詩人尙有名

提起當年王子敬風流頓盡哭吞聲

曾經戎馬亂離間南北驚心道阻艱早有親朋傳死信

尙聞兄弟望生還

癸亥其兄來書  
猶勸其歸里

歸魂無路通滄海朽

骨何人返故山久客遼東爲客鬼夜臺誰更唱陽關

空時臨穴殮憑棺使我傷心老淚彈此別山河今日邈

相期魂夢異時難登牀再取瑤琴絕入土長埋玉樹殘

龍首東山舊游處與君卜葬亦平安

葬於龍首  
之西麓

近鄰荒冢與誰偎幽女高僧伴夜臺聽法偶隨禪伯坐

問詩或有麗人來共教白骨傳千載難得青山葬一堆

素願已諧應大笑知君還醉九泉杯

去年秋余與文瀾  
謂蕉園曰他年倘

歿於此我等當卜葬於龍首山在山月韻娘兩墓之間  
夜台殊不寂寞矣蕉園大笑曰公等果能如此死無憾  
也今年上元之夕與其門生靜湘夜飲偶話  
及此靜湘慰之曰先生何云爾耶既而慘然

遼東遺草手重披

著有遼東客吟草

獨坐燈前暗自悲每得新

詩教我看再吟佳句有誰知緣深或結三生友律細常

爲一字師擬向黃泉報知己爲題姓字墓門碑

墓前立一石碣

書山左詩人王蕉園先生之墓竝撰文刻於碑陰

### 預誠窮神詞

昌黎老叟非達人爲文擬送五窮神五窮依之不忍去

世上未有公能貧後世更有周青在繪圖迎窮若相待

蔣苕生有題周青在迎窮圖詩一篇

翻恐窮神不肯來再拜臨風祝勿給

妻生夕陽窮工詩平生與窮交相知作歌留窮不使去

但願生死無別離

會稽妻承雲自號夕陽山人著雞肋詩草有留窮歌

古人好奇

何其多爲文繪圖兼作歌竟使五窮不能決躊躇搔首  
將如何我今告窮神我與古人殊爾居我不送不下逐  
客書爾來我不迎不效望風趨爾別我不留不屑挽長  
裾往還無賴任君意坦懷何怒何歡愉況君本非我良  
友欺我無時只低首一旦錢神擁駕來氣餒逼君自驚  
走倉皇送之已不及或迎或留拒不受低徊稍有依戀  
情怒叱驕奴奮拳毆慌慌如被驅爵鷗茫茫又類喪家  
狗旁人唾罵切同仇我亦揶揄笑破口豈知得罪世人



多那肯往救援以手窮神感我前致詞蒙君肝膽示我  
知我將遠遁天之涯免遭財虜加鞭笞飄然長往無歸  
期與君矢誓從此辭卽今拔斷窮根基子孫世世勿相  
思

春暮歸山莊

小別田園入市闕邇來一月忽思還春歸我亦到家日  
門外杏花開滿山

雨後曉起

桃花滿地雜榆錢墮綠飄紅雨後天曉起看花階畔立  
一聲啼鳥破晴煙

四月十二日心潭僧招飲竝邀劉崑圃

玉林廣文

曹春山

午曦

上舍張枚齋明經商文瀾兄弟置

酒慈清寺卽席感賦

三月春歸杏花落四月南風破桃萼昨夜微雨今朝晴  
恰好看花出城郭少年上人號心潭鉢傳山月老瞿曇  
置酒龍華作高會特招我輩皆蒼髯蒼髯老叟六逸客  
中有廣文劉夢得上人致語前進觴不爲看花看山色  
青山長在水長流花開花落春復秋且須痛飲及時樂  
莫令青山笑白頭忽憶當年吳蘭次載酒看花到山寺  
狂飲曾招趙倚樓大家同向花前醉

道光癸卯吳仲培  
置酒慈清寺招同

人飲酒看花一時有趙海門廣文父子並袁甘泉王矩  
園張枚齋商文瀾與余共九人今皆雲散半歸道山唯  
余與枚齋文瀾尚存耳此景回頭廿八春風流雲散隔前塵爾時

都在少年日今日翻成白髮人吁嗟乎世事推遷變桑  
海昔日人非山不改又遇張筵似舊時座中賸我三人  
在停杯不飲感慨深故人已邈何堪尋遠公一去尙不  
返謂山空餘慧寶居東林狂興復發悔惆悵英雄淘盡  
東流浪縱使名慙蓮社賢我今且學陶元亮

### 溪上晚步

近聞流水聲水鳥尙飛鳴山暝月初上溪幽人獨行雨  
含平野潤雲漏遠天晴回望村邊樹燈光幾點明

夏日與村人閑話

衡門夏日長柳陰散濃綠避暑村人來箕踞話心曲老  
農不讀書言詞率真樸相見說禾稼次語種樹木比歲  
值薦飢全家缺餽粥小兒已及婚聘財苦不足諸孫漸  
成童無力使就熟舊累債未清新逋積又續今年雨水  
稀未卜秋豐熟耕牛多有災死者無遺犢兵差況又過  
嚴於催租促秋來天氣涼老稚衣未贖我聞老農言仰  
天歎欲哭世上貧賤人夫豈老翁獨

晚酌喜成

夕陽在巷晚煙飛正慮盤餐佐酒稀孫子攜籃兒舉網

笑從溪上得魚歸

野眺偶憶甘泉

幾戶炊煙映夕陽  
西風吹散小村莊  
秋雲欲雨不成雨  
落葉未霜如著霜  
過嶺鴉羣千萬點  
排空雁字兩三行  
故人遠別無消息  
不見題詩寄草堂

秋晚散步偶成

爲訪秋光策杖尋  
悠然獨往且孤吟  
夕陽未落月先上  
暮雨欲來天又陰  
息作野人歸里巷  
倦飛幽鳥入山林  
衡門我已棲遲久  
不作閑雲出岫心

秋日田家早起

夜炊婦子看辰星人到忙秋睡不醒賴有五更雞早唱  
喚他田舍四鄰聽

山居雜述十二首

自愛山居僻門前少客車鄉村過忘日鄰舍借無書婦  
老勤收菜兒閑學網魚我時亦努力庭草穢常鋤

山起衡門外秋來小院中貓窺花徑蝶雞啄草廬蟲壞  
壁新泥雨疎窗破紙風恐妨燕飛入不肯下簾櫳

八月瓜茄老閑園雨更蕪短籬開晚葢小樹綴秋蒨泥  
穴畦邊蚓絲懸草際蛛日來涉成趣寫入隱居圖

庭戶雜賓少山窗午睡餘鄰翁時借酒遠客每求書雨

蘇荒三徑秋花媚一廬自然幽興足小酌未能疎  
久處隨鄉俗相安樂土依婚喪田舍儉爭訟里人稀市  
遠無珍味民消盡布衣古風今尙在問是葛天非

攜兒打松子種樹向新阡爲護先人隴權遺後世田未  
歸九泉下早計十年前他日成佳蔭無憂掃墓錢

霞燒不成赤雲來收夕陽秋寒晴日少風定雨時長村  
舍望新稼山田怕早霜磨鎌待朝霽先穫向東岡

雨水連年大逢秋損麥禾家貧尊客少歲儉乞人多牛  
疫翻求馬雞廉不養鷺鄉民正艱食況又調兵過

築圃納禾稼涼宵月正圓村燈遲晚飯野火逗秋田人

語隨山遠車聲過隴顛農勞殊未已每至夜深眠  
比戶嘗新穀田家樂有糧秋忙童散塾夜警叟看場木  
葉初飛樹棉花未著霜預謀御冬菜更漬晚菘香  
事少閑如客山齋坐聽鴻小窗糊紙白老樹著霜紅暖  
噪高枝雀晴飛滿院蟲村夫誰識我田舍一詩翁  
皞日三秋暖邊風九月涼田傭塗敗壁農器挂空房歸  
燕已辭壘吟蛩初在堂篝燈忙織婦又要授衣裳

閑居遣懷

平生抱刺不干時投老林泉頗自怡僻處未諳臺閣事  
狂吟都是野人詩羞聞婦孺知羅隱敢向公卿望子期



九梅村詩集

卷十六

縱有鶴書逮蓬華鬢毛況已白如絲

厭聞時事起風波自幸潛身在薜蘿近歲病猶欺我少  
晚年淚是哭人多

時姜紫垣謝世

劍因換米貧將賣墨爲工書

老尙磨漫笑好名心未已光陰不肯付蹉跎

尋常每飯亦開樽醉擊田家老瓦盆歷數舊時人盡歿  
幸看今日我猶存糟糠婦老勤如婢豚犬兒孤育有孫  
甲子欲週三百六長生何必問劉根

感悟

前生應謝輓塵紅悔鍊金丹九轉功失卻本來人道後  
換將現在世緣中身非到老焉知死心不忘貧尙未空

畢竟如何作歸結也須訪道向崆峒

茵溷分投記不真茫茫五十九年春夢中偶歷前生境  
醒後方知故我身飲啄尚非無定數妻孥亦是有緣人  
從來事事關因果窮達何須用喜瞋

卽事率吟

閑門避客晝長局自掃清寒雪滿庭情重每憐衰婦病  
性偏獨愛小孫靈舊書有味還重讀俗事添愁最怕聽  
分付家人忙煮酒昨朝新啟紹興瓶

九梅村詩集卷十七

鐵嶺魏燮均公隱甫編

岫巖倦遊草

辛未

宛平劉杞松雲選訂

正月十一日王后農招飲

居隔六七里相招倒酒樽  
雪消通陌路樹引到山村  
雅有林泉樂稀聞車馬喧  
家僮候來客翹首立蓬門  
下馬入庭院草堂春氣增  
笑言新歲酒特會老年朋  
暇日正堪醉過時殊未能  
感茲主人意痛飲盡三升

六十自壽十二首

潦倒林泉一老翁  
龍鍾不與昔時同  
論年今始週花甲

卜歲何由問木公鏡裏但看霜鬢白人閒賸有夕陽紅  
向來榮辱關心處到此都歸一例空

敢將上壽望前賢如此春秋詎偶然若論人生非短命  
再邀天假是餘年縱無事業遺身後尚有兒孫娛目前  
除卻窮愁多債累邇來我亦似神仙

自幸年華過少陵老來風骨尙崢嶸苦吟歲月成詩癖  
供養烟霞或壽徵愛說修行還俟佛思除煩惱欲爲僧  
幽居更喜無人問心對梅花冷似冰

閱盡滄桑眼欲昏回頭小劫不堪論素心朋輩多先逝  
白髮山妻幸尙存苦被後生催我老翻成前輩讓人尊

從今莫動遨遊興只合空山靜閉門

昔年盛氣未能平行止殊慚座右銘自覺輕狂多口業  
每思懺悔誦心經曠懷不必論窮達俗眼何妨任白青  
過要恕人須責己前賢遺訓最堪型

投茵墮溷各前緣理數安排聽自然富貴何曾皆大壽  
困窮容或有長年但求身健能無病縱使家貧亦樂天  
試學古人頤養術也應嬰鑠到華顛

褐衣草屨卧林邱目慘烽烟十數秋徒說枕戈平寇盜  
未能提劍取公侯浮生於世真無補垂老逢人轉自羞  
幸際 聖朝容養拙仁看戎馬靖中州

日日擎杯強作歡自家努力勸加餐  
老來更覺光陰速貧裏深知世路難  
才薄只應甘伏櫪命乖何必羨爲官  
拚將一醉中山酒不用悲歌把劍看

移家紅杏小山村二十三年此閉門  
負米昔曾爲客子讀書今又見童孫  
近來里戚皆新締舊日鄰翁已不存  
鄉黨論年行屬我每逢社飲讓先樽

且喜閻羅不見招願將百歲老漁樵  
人雖未足傳千古我已居然歷四朝  
樗櫟無材心不腐爨桐有用尾先焦  
自彈流水高山曲何必知音嘆寂寥

漫笑襟懷作達觀也知無處覓金丹  
出行不必常隨錘

未死何妨預製棺景逼桑榆思返妄壽非金石強求難  
且拋修短彭殤數一日偷閑一日安  
人事茫茫無了期總歸石火電光馳啟期且幸爲人樂  
蒙叟還興息我悲畢竟賢愚誰作達從來夭壽本難知  
但教百世呼名姓卽算長生不死時

### 山居述事

山居荏苒廿餘春幸得平安到六旬垂老夫妻同怕病  
倚親兒女不知貧有時種樹防流水無力耕田租比鄰  
從此不聞風鶴警百年高卧薜蘿身

上元後忽得潘沛山

作霖

薦書應岫巖英別駕之

聘感賦

林泉棲隱十餘年忽接徵書聘仲先馮婦下車慚士笑  
塞翁失馬見人憐也知生計貧爲累尙幸精神老未顛  
幾度躊躇問妻子此行特爲覽山川

聞岫岩山水甚奇故應其聘

臨行留別故園

暮年揮手故山岑惆悵登車淚不禁兒女戀行因路遠  
老妻傷別獨情深在山泉本爲清水出岫雲還有懶心  
且把婉言相慰藉平安常報尺書音

過遼陽

春寒漸退柳條黃又上征車道路長我未離家三百里



花朝時節過遼陽

過海城前台子訪子循不遇

數年思造訪今始過幽居藉聘枚生駕來尋魏野廬桑  
麻新里社雞犬小村墟爲問伊人迹門前偶駐車  
昨日入城市主人猶未回兒童幸能識老僕訝初來向  
野起新屋耕田依古臺登堂備雞黍獨酌意徘徊

海城喜晤子循

尋常嫌契濶方幸接音容過里不相見到城翻喜逢詩  
求近時作書得去年封語竟登車去東南山萬重

初入岫巖道上作

百里引迢遞亂峰爭送迎入疆詢土俗隨路問村名人  
隔水邊語雞啼林下聲僕夫經過熟約略說郵程

分水嶺小憩

綠溪行到嶺過嶺水分流烟起孤村店雲飛古寺樓亂  
山迎客出壞道累僧修我且停驂息題詩紀遠游

岫巖道中

馳驅百里路迴環度嶺緣溪不記彎一水曲通龍鳳峪  
三峰高並弟兄山三峰並峙土人名弟兄山頗資游覽添詩興強耐  
風塵損客顏聞道岫巖城尙遠明朝猶在渺茫間

途中卽事

遙望似無路到時峰忽開孤村過嶺見一水逐山來野  
鳥叫林樾居民耕草萊敦龐有古俗經此亦低徊

晚次大偏嶺

途長未過嶺嶺下欲黃昏早月出山徑殘陽餘店門霞  
明臨道樹煙暝隔溪村到此應投宿何須問旅殮

過雙泉寺

路轉不知遠崎嶇經幾邱山當門並起泉夾寺分流地  
僻僧開店林空鳥住樓更無鐘磬響但聽水聲幽

客夜書感

客中誰慰暮年情獨坐無聊減短檠夢裏正隨兒女話

又聽衙鼓報殘更

寄家書

別後應知盼遠音  
一家翹首海雲深  
燈前細寫平安信  
先慰山妻兒女心

偶書客懷

十年不作客投老  
忽離鄉生計田園拙  
情懷兒女長寄書  
逢驛使歸夢戀山莊  
遙憶門前柳垂垂  
應已黃

自述

性情不諧俗孤峭  
冷於冰中歲漸皈  
佛前身應是僧客  
邊每多感詩外更  
無能只合空山老  
何須世見稱

感懷亡友拓園蕉園二君

兩箇詩朋委世塵每當索句便傷神  
鄧魴見喜唐衢泣此後相知有幾人

署齋感懷

投老託官衙生涯亦可嗟  
莎生當徑草杏放隔牆花  
作客忽經月寄書應到家  
去年在田里猶記課桑麻

閑遣

已退輕寒換袷衣  
訟庭草長吏人稀  
隔牆一陣東風過  
吹落梨花作雪飛

暮春漫興

客中時節易蹉跎  
眼底韶光有幾何  
花落絮飛啼鳥散  
滿城春色已無多

三月十六日送春

正逢三月艷陽辰  
底事匆匆又送春  
欲乞東皇遲作別  
天涯我是未歸人

遣興

焚香淪茗似僧閑  
終日猶勞筆硯間  
風雨夜來花滿地  
園林春盡鳥歸山  
酒當飲少猶防醉  
詩爲存多又痛刪  
潦倒光陰如此過  
不堪持鏡照愁顏

游岫巖西山松雲寺

出城眺林壑取暢此幽情到寺日方午入山天已晴閑  
房聞磬響高殿有松聲一笑逢僧話塵懷頓覺清

自編拙集漫題

弱冠吟成兩鬢華每慚細響陋箏琶何曾言語妙天下  
不過性靈抒自家司馬情多衫有淚江淹才盡筆無花  
手編詩集三千首留與兒孫亦可嗟

幕中雜述

十年不出門出門忽已老妻孥率相勸阻我登長道我  
慮食指繁家計艱溫飽況遭歲荐飢粟菽貴於稻稱貸  
徧親朋典衣及襁褓山田敢卜秋安忍坐潦倒岫巖山

水奇藉此縱搜討我年雖六旬老子興頗好既不苦風

塵而喜曠懷抱重登傀儡場脫卻事紛擾

余家居以俗事干者頗厭

共援遂此平昔懷刪訂故人草

時訂亡友蕉園詩草

晚餐醉數杯一

夢到春曉

前有理公堂後有燕寢室中介小西廂設榻可容膝聘  
爲句讀師兼司書記職碌碌雖役形心曠神頗逸和風  
二月來淑氣動繁植萬物競滋榮海邦見春色嘉木葉  
滿枝垂蔭廣庭北小窗東向紅朝晴上旭日好鳥齊作  
聲睨睨諧音律紛然忽散飛飛飛復來集似憐我寂寥  
故啼向我側砭茲俗耳清新詩吟已得



夜雨放新晴溼雲猶爨黠開門望東郭青山正相對飯  
後恣流覽足不出公廨五柳祀爲神中有靈蛇怪因之  
問老吏越有百年代往往顯神異不爲官民害所以沿  
至今香火肅展拜語竟歸小齋閑與我僕話階前有隙  
地旣晴斬荒穢剗土壘爲畦種花兼種菜豈學灌園翁  
且慰無聊賴點綴小庭前隨時生意在署中有五柳相傳百餘年頗著靈異中有巨蛇見之主署中有事建祠並祀之

杏綻胭脂紅梨開雪花白柳垂金縷黃榆綴古錢碧苔  
蘚綠壁青芍藥映階赤覽此風景幽頗似隱人宅雨餘  
花亂飛風來絮輕擲紛紛掃不開茵溷雜狼藉春去竟

不知閑庭空寂寂衆鳥忽歸山  
牕有黃鸝隻朝朝獨自啼  
住久若相識報道春已歸  
胡爲尙在客殷勤謝黃鸝  
累汝多情惜行當化燕身  
奮飛返故國

雨後游眺

衆鳥噪林際芳原雨乍晴  
河聲奔遠郭山勢抱孤城  
農笠穿禾出人煙隔樹生  
客懷殊莫釋一眺足娛情

五月二十八日得家書作

作客忽半年離家六百里  
殷勤三寄書平安慰妻子  
遲遲久未荅心懸悵不已  
今朝驛使來忽得書一紙  
急展函細看絮絮述端委  
老妻病已痊老僕病旋死  
兩孫各

依然長讀幼嬉耳吾兒獨持家田園頗經理穀苗滋不  
新當春苦雨水剪茅葺敝廬築垣整頽址夙興尙能勤  
家政未廢弛俾我離鄉翁帖然心殊喜吾兒念我老切  
切勸不止歲暮辭北歸莫再遠游矣覽書三嘆吁家貧  
奈何爾

曩昔別里門妻子戀我行我云到岫巖有書通驛程三  
月上巳日適遇人北征始作書一封懇致鐵嶺城並煩

我老友轉遞山家局

託商文  
淵轉寄

我兒得我書念與渠母聽

母子俱歡喜知我客中情起居尙强健飲食努力增雖  
然水土殊幸無疾病生小孫競奔來環側聽其聲怡然

問阿祖何日來家庭老妻撫孫笑欲語淚轉熒汝問汝  
祖歸臘月盼行旌

論詩我有三千首

論詩我有三千首足抵豪家百萬金以此據爲千古業  
賴茲聊慰百年心壯夫不屑雕蟲技俗子安知擁被吟  
獨有蕭騷老狂士興來高詠傲華簪

論詩我有三千首問歲今方六十年也算人間不虛度  
未知身後藉誰傳平生鐘鼎原無分當代公卿亦少緣  
手把吟編滋太息低徊猶望子孫賢

張子房

相韓累世報韓仇博浪沙中志未酬進履早聞黃石教  
全身假覓赤松游亡秦曾見烹功狗滅楚翻忘困沐猴  
心識漢高恩最薄自明知足請封留

嚴子陵

共卧依然舊日親誰知犯座動星辰本非傲慢輕天子  
猶當尋常見故人外氏家風同愛隱中興聖主不能臣  
先生自著羊裘釣終古漁翁屬富春

晚眺憶故園

風光隨處好總覺故園非野水含晴色山城下夕暉片  
雲隨月上獨鳥破煙飛念此淹留跡何時賦北歸

雨夜憶文瀾

城上層陰掩夕陽  
蕭然獨坐到昏黃  
暮雲低壓天光黑  
夜雨深含海氣涼  
別後愁添孤客重  
老來情戀故人長  
回思把酒論文日  
翻悔重登傀儡場

署齋雜興

療貧無術寄人籬  
忘卻年華兩鬢絲  
依舊登場爲傀儡  
回頭不似在山時

燕子雙雙認幕頻  
呢喃來往定巢新  
開簾相待不飛入  
知我非他舊主人

細草荒苔綠不除  
好留生意對吾廬  
研朱收取花開露

坐向晴窗點四書

時兼教讀

忽聞春盡欲登樓  
要看春光解客愁  
一夜東風吹到曉  
杏花開過短牆頭

梨花亂落柳花飛  
片片漫天作雪霏  
都似纏綿惜離別  
也知不忍送春歸

金鈴小犬吠花叢  
知有人來曲院中  
驚起夢回辜箔望  
一雙蝴蝶過牆東

桃花如雨草如茵  
又看花開到殿春  
桑葉採殘陰漸薄

金閨也學養蠶人

署中官眷亦養蠶

花影參差樹影歌  
寥寥衙鼓報更遲  
絕憐一片多情月

猶似山莊照我時

官衙習靜卽禪關卻有閨人入道閒  
早晚焚香常誦佛一聲清磬出花間

檐蛛斜挂樹間絲織網粘來紛蝶衣  
我爲愛花兼愛蝶持竿救取放還飛

豆棚瓜架雨瀟瀟獨耐淒涼坐半宵  
如此聲中眠不得窗前幸未種芭蕉

紗帳支開六尺餘安排枕簟晚涼初  
雙鈎齊下防蚊入自點蘭燈卧看書

登岫巖城晚眺



明霞燒遠天極目女牆邊高樹有殘照孤城多暮烟依山雲繞寺背郭水圍田霪雨經荒歉因之憶往年

霪雨

霪霖不見日四望海雲昏水沒平田隴河侵近郭村敗茅頽破屋亂石倒殘垣更聽鄉民說波臣夜入門

久雨

兼旬逢久雨苔草滿庭荒瓜蔓升高樹花梢過短牆雞鳴知日午蟬響逗秋涼每盼陰雲薄燒晴看夕陽

立秋偶書

海天漠漠海雲浮暑氣連朝帶雨收怪底蟬聲一齊噪

耳邊爲我報新秋

乍驚涼意滿山城況復瀟瀟雨未晴獨有離鄉衰髮客  
秋來最怕聽蟲聲

客子匆匆歲月忙逢秋盼臘好還鄉歸心悞喜光陰速  
忘卻多添兩鬢霜

曉起卽事

不聞啼鳥喚早起聽鳴鐘夜雨隨風散朝煙背日濃城  
頭生小樹山口出遙峰喜見新晴色秋雲疊幾重

偶成

浮生一夢總茫然混到人間六十年翻恐業多常誦佛

祇因情累不成仙本來早忘前生相過去安知後世緣  
欲學莊周進修法朗吟秋水馬蹄篇

七夕夜雨

天高星漢陰漠漠海雲沉一夜雨疎下滿城蟲亂吟英  
雄遲暮淚兒女故園心不有別離感淒涼已覺深

聞蛩書感

啼煙嘶露滿庭莎苦調淒清恨若何絕似草茅寒儉士  
文章秋氣得來多

終宵唧唧作秋聲也有牢騷意不平未必愁懷多似我  
如何終說不分明

鳳鳴鸞臧向春風爭逐鵷班御苑中不學和聲鳴盛世  
奈何甘作可憐蟲

秋燈黯淡月斜明和我吟詩句已成自笑窮愁工韻語  
蕭騷大半似蟲聲

自鳴天籟亦孤音最感騷人客子心彷彿千秋廣陵散  
獨彈絕調到如今

黃鐘毀棄委風塵瓦缶爭鳴調轉新任爾苦吟吟到死  
多情那有賞音人

七月二十二日又得家書率吟示庚兒

海邦遠隔故山廬地僻人稀信亦疎展轉郵程經累月

半年纔得兩封書

拆函急展背人看  
老眼頻揩頓喜歡  
妻子兒孫各無恙  
一家難得盡平安

田禾雨足好年光  
報道秋成大有望  
新穀未登倉已匱  
典衣猶買月餘糧

岫巖秋望感興

乾坤萬里接風烟  
獨立蒼茫興浩然  
秋色西來通渤海  
曉雲東望極朝鮮  
側身人世如遷客  
過眼光陰感暮年  
牢落吾生終寂寞  
何須搔首問青天

秋齋漫興

西風拂徑掃晴煙挂起疎簾雨後天暖退殘花猶有蝶  
涼歸高樹已無蟬枝垂熟菓當檐落蔓綴秋瓜貼壁懸  
遙憶故園荒草徧書來屢勸早歸田

雨夜感懷

寒蛩吟不斷多在雨聲中衰客髮垂白秋燈花不紅上  
書悲老大學劍愧英雄徒作依人計飄然類轉蓬

陰雨書懷

秋雨九日連晝夜遞相引欲晴不肯晴朝陽現復隱漏  
屋墮承塵頽壁落殘粉瘦草悴漸萎零花摧欲隕荒砌  
啼寒蟬泥穴叫秋蚓當此慘澹陰天意似含憤官庖乏

燥薪頗慮炊煙窘體羸戒拒寒調攝惟自謹念我遠游  
人垂老動悲憫辭家失晏居乃就海邦尹風聞有檄遷  
冀望桑梓近時英別駕有調昌圖之信彈鋏歌歸來舉杯不能盡況  
屆授衣時旦暮霜風緊

八月初四日曉起續夢中句

庭外秋花慘澹紅曾經連日雨濛濛碧雲暖散晴無影  
高樹涼歸夜有風此聯夢中句抱葉一蟬鳴曲院分巢雙燕  
別簾櫳夢中亦覺光陰速愁煞吟詩陸放翁

雨後晚眺

海天新雨過山色晚晴分蟲語在秋草鴈聲來暮雲孤

城臨曲水高樹帶斜曛時見昏鴉集西風送幾羣

送孫夔齋還京都

丈夫當用世此別獨情傷西去燕山遠東辭遼水長  
廿年車笠友九月驛亭霜遙灑臨歧淚蕭蕭鬢各蒼

秋暮野游

碧雲歸海上秋色滿荒邊平野落斜照孤村生暮烟  
笳吹山外戍雁叫雨餘天獨客蒼江立吟懷亦浩然

晚眺

烟色晚蒼蒼城頭下夕陽人歸山郭近鴈入海天長  
淺渡秋無雨疎林夜有霜寒衣當授日遠客正思鄉



秋日登文昌閣遠眺

峻閣登臨獨倚欄，孤城蕭瑟繞重巒。  
曉日晴分海色寒，故國北望通塞上。  
中華東極到江干，何堪斯地長爲客。  
行賦歸來歛欲彈。

秋日旅懷

曉起北風烈，滿城黃葉飛。  
自憐秋館客，久別故山扉。  
天遠征鴻斷，梁空旅燕歸。  
遙知小兒女，念我寄寒衣。

野望

高原一臨眺，老眼復摩挲。  
晴樹水邊少，秋山城外多。  
雞鳴墟里接，鴈度海門過。  
爲問東邊事，烽煙近若何。

時土匪嘯

聚滋擾  
東邊

與幕中諸友再遊西山松雲寺

招提久不至風景頓成殊  
霜葉滿林墜秋雲連壑趨  
客來山破寂僧去佛嫌孤  
再到禪房憩殘花賸幾株  
層階百餘級上接碧霞宮  
雲路來高鳥松濤響下風坐  
觀城郭小遙望海天空  
倘得驂鸞去神仙或可通  
流連坐峰頂欲去轉遲遲  
故國一歸後此山無到時  
乾坤原是寄雲物頗相思  
爲向山靈道茲游卽別離

秋感

南去衡陽鴈驚寒尙遠征  
秋風吹落木夕日下邊城  
海

國猶多盜巖疆未息兵自嗟垂老客歲晏滯歸程

九日偕幕中諸子游城北玉皇閣登其後山遠眺

重陽天氣清出郭亂山橫河水馬能渡野橋人自行路

隨峰轉入村與樹齊迎

入山先經一村

谷口行將近稀聞鐘磬

聲空山藏古剎來謁玉皇居紅葉綴秋樹白雲生石廬

徑荒無客到泉塞少人疏聞說閑廊舍高人此讀書

于松

岩先生設帳於此

一叟司香火終年似道家汲泉炊石髓掃葉煮山茶春

至聞啼鳥秋殘看落花惟應與佛語絕少世喧譁

陟彼重岡脊高臺試放歌近山爭抱郭遠水亂歸河平

壤田殊少荒村屋不多舉頭礙窮目四面盡嵯峨

秋陰感興

獵獵朔風生天光晦不晴秋雲連海嶼寒雨入邊城野

暗烽臺火村嚴戍鼓聲聞聞正饑饉愁絕見屯兵時莊河龍

王廟等處皆有官兵駐戍

追懷亡友許好山

好山諱際閣岫岩詩人

故人謝時去早入道山岑今作天涯客空思海上琴乾

坤詩卷在

著有吟春山館詩鈔

生死雁音沈欲訪徐君墓秋風瑟

瑟吟

書感

四郊多壘日千里別家時妻子夢中見故人天末思秋  
花藏老屋霜葉下空枝況乃邊風動蕭蕭竟夕悲

出郭

出郭行不遠平橋扶杖過秋山晴見石野水淺無波小  
墅炊烟少高原落照多遙聞有樵唱隱隱下岩阿

署齋自遣

斗室蕭條獨客居風迴落葉積庭除霜寒怕凍藏秋菊  
日短愁昏課夜書誤把青袍容我著羞將白髮遣人梳  
浮生終竟成何事徒守窮經老一廬

署夜

鳴拆隨衙鼓三更報未過夜長聞漏永月黑見星多剛  
息挑燈讀猶傳橫笛歌那知滄海上有客枕雕戈

秋郊寓目

山迴微雲淨天高爽籟含暮煙沈遠戍秋葉落寒潭兵  
氣連江上民風近海南如逢良吏治安業識農蠶

老境

六十已云老精神殊覺非齒疎憎食肉肩重怕添衣未  
鐸鬚全白頻梳髮更稀元龍負豪氣漸與昔年違  
耳目依然具聰明大異前看書難強記遇事每遷延人  
或笑遲暮我猶思少年金丹能却老悔不學神仙

郊外散步

山城秋氣蕭萬木響蕭蕭流水繞沙郭斜陽橫石橋天  
空聞去鴈野濶見盤鵬時值歸人問前村幾許遙

咏白菊

月色溶溶映草堂幽人相對祇聞香秋容澹到無顏色  
猶笑黃花是豔妝

咏殘菊

開過重陽強自新花殘猶有傲霜神莫言垂老先低首  
不看榮華世上人

月夜聞彈琴

伊人彈素琴涼月畫堂深忽弄水仙操驚聞太古音我方悲絕調世豈有同心如解高山曲相期共入林

岫巖書事

萬壑森邊氣孤城澹夕曛亂山臨海斷外國到江分寒  
熄新營火時海上官兵撤防晴燒故壘雲至今談古蹟猶說薛

將軍

城東北有薛禮站廟祀薛仁貴像卽當年戰壘

山川鬱相繆東望鳳凰城海日迎霞出江雲隔樹紅  
稀分野色風動起邊聲歲晏謀歸去誰知遠客情

鳳凰城懷古

按通志鳳凰山古之石熊山也上有古城壘石



爲垣周二十里唐薛仁貴征高麗與其大將溫  
沙門戰熊山擒善射者於石城卽此今鳳凰城  
或卽古之熊山縣也

鳳凰飛去不復見空餘城堡臨荒甸千載長流鴨綠江  
故墟猶識熊山縣熊山自昔陣雲屯征遼尙說薛將軍  
生擒善射破強敵俘其大將溫沙門擒敵乃在石城裏  
城據熊山疊石起青山無恙故城存風雨天陰聞戰鬼  
當年大破高句麗麗人喪膽聞白衣至今遺壘祀爲廟  
精魂猶鎮江之湄我今初歷娑娑路龍原壁谷不知處  
道逢居民問古城依稀遙指雲端樹臨風慷慨懷英雄

勤王誓憤收奇功從此限夷荒服外遼東全入版圖中

歸遊王洞

洞在海城東南五十里

歸途經古洞中有道人居松老招仙鶴山空響木魚歲

深丹在鼎雲暖石爲廬聞有高賢過當年此駐車

康熙間有

某將軍遊此

洞名遂著

九梅村詩集卷十八

鐵嶺魏燮均公隱甫編

西曹幕吟草

壬申

宛平劉 杞松雲選訂

閑居自慰

風塵碌碌復何如  
邱壑聊安謝幼輿  
百歲有詩留子讀  
一春無病在家居  
舊營茅屋三間大  
續買山田二頃餘  
從此不煩憂凍餒  
閉門閒課兩孫書

友人劉松雲刺史強余出山薦爲銘鼎臣

安

司寇

幕僚不得已遂應其聘臨行留別故園

泉石起高卧不容疎懶身此行重知已垂老強依人幸

與故鄉近況兼吾道親暫辭鄰里去莫認走風塵

答松雲見贈

十年萍散各分離今日相逢髮已絲未免傷懷談舊雨

謂亡友依然故態誦新詩早聞宦海乘風順君由司理

王拓園州加運同銜小隱林泉避世知忽被使君推轂薦片雲又是

出山時

出山小草倚卿雲未必虛聲副見聞謬把工詩稱魏野

恐將知己負劉蕡論交白首如金石續學青年愧典墳

惜我清貧憐我老故人情重獨逢君

附松雲見贈原作

不能飲酒好談詩卓立騷壇筆一枝文字交情同骨  
肉英雄豪氣見鬚眉一囊風月懷知己十載星霜感  
別離今日相逢在瀋水小橋飛絮落花時

客窗無事再吟四首呈松雲

送窮窮不去到老尙隨身愛我成知己依君似故人雄  
心猶浩蕩詩骨獨嶙峋不屑猖狂哭徒悲阮籍貧

君年垂六十我已六旬過吏隱分途老升沈奈命何家  
無長物在囊賸拙詩多買得青山住聊爲安樂窩

昔年邁離亂戎馬總驚心久絕故人訊稀聞空谷音移  
家紅杏塢種秫白雲岑自守安貧志躬耕伏舊林

幽居最疎懶車馬謝柴關倦鳥總依樹閒雲偶出山置  
身高處拙應世老來艱且作隨緣計無心任去還

松雲將歸任甯遠賦此送之

送君西去著吟鞭賦別江淹亦黯然轉眼春風到楊柳  
再相逢處是明年

舊雨相逢已恨遲渭城重唱賦新詩劉郎雖老風流在  
不減當初把臂時

贈王雪樵病中

老去關心是舊知晨星落落與君期故人無死何妨病  
名士非窮不算奇相對白頭惟有婦自傷黃口竟無兒

丈夫須作蒙莊達看破浮生一夢時

述懷竝喜晤謝薦兼酬惠書寄呈松雲

自謝青蓮幕於今十二年烟霞殊有癖軒冕已無緣養拙息林麓謀生耕石田聊爲娛老計不肯乞人憐

去年正月杪潘岳寄來書

謂沛山

薦我作書記強余登客

車出山雲意懶辭谷鳥聲疎無奈復行旅悽然戀舊廬

荒陬兼歲歉況乃見兵屯烽火連邊徼洪濤下海門

去年

岫岩雨水甚大諸河泛漲

賊驕孤嶼氣客警異鄉魂決作歸田計耕

桑守故園

賊出沒於海上大孤山

昔年過錦水造訪不逢時政美聽人說交疎使我疑音

書千里隔風雨十年思文字通神契應知有後期  
大笑道衷曲今逢瀋水濱閱深熱場冷別久故人新詩  
少猶誇富官廉不畏貧元龍有豪氣不屑送窮神

老驥已無志何期薦魏扶侯門爲上客幕府愧侏儒飽  
叔猶憐我曹邱尙念吾丈夫報知己徒有寸心珠

迴首不堪憶風流轉眼非晨星老友在

謂王廣棠與君也

昔日

故人稀鴻爪偶然聚驪歌忽又違寄書猶問我感激涕  
頻揮

讀淮陰侯傳

見機獨早是張良可惜淮陰不善藏忘卻當年爲餓殍



將軍不足請封王

獻計無心聽蒯通  
好名本色是英雄  
漢高何事多猜忌  
不念亡秦滅楚功

淮陰侯廟詩和鼎臣先生作

將兵十萬薄高皇  
自命英雄禍已藏  
天子無心思猛士  
丈夫失計受眞王  
蕭條淮水秋風急  
寂寞空山落日黃  
我過叢祠猶灑涕  
不堪再見釣臺荒

贈鼎臣先生

厚幣相延入幕賓  
誤聽魏野是詩人  
虛懷若谷能忘勢  
問道於盲愧指津  
富貴不矜猶本色  
雲泥偶合亦前因

九梅村詩集

卷十八

四

自慚分坐龍門席縱使聲加已六旬

硯田荒廢事躬耕絳帳重開愧老成末路英雄一學究

髫齡兒女兩門生

女名會榮  
男名那晉

才疎患在爲師拙望重心

期報 國榮倘使殘年猶健在衰翁或聽到公卿

述懷呈鼎臣先生

不能萬里謁 君門潦倒桑榆景已昏烈士每深知已  
感丈夫終愧受人恩放翁富興詩千首靖節陶情酒一  
樽只好醉中詠風月茫茫春夢不堪論

寓感

天地本空濶悠然皆化機遠鴉投樹去高燕入雲飛蝶

戲尋花塢魚游避釣磯自憐垂老叟局促爲人羈

田家雜興

仲春苦雨稀高原土不澤昨夜微雨過力耕向阡陌  
凌晨起飯牛試犁先種麥家人率勤動終歲從此役  
豐嗇安可知但慮飢寒迫穀雨會有期農忙益無隙  
丁壯滿隴畝婦子守園宅作苦每終日炊煙熟已夕  
歸來村巷昏燈光出籬柵

書懷寄松雲

百里又爲客低徊出里門身孤倚僮僕年老戀兒孫  
識字命原拙能詩道亦尊鄰生延入幕每感故人恩

夏日與鼎臣司寇遊萬泉河因憶舊游感賦

消夏向何處相偕游萬泉  
恰逢新雨後宜趁早涼天  
不到舊遊地於今三十年  
重來增感慨風物轉悽然

我友昔招飲芙蓉開滿河水邊  
看月上花下盪舟過童

子橫橈立漁人隔岸歌風流已銷謝  
回首悵如何

道光戊戌

友人任香海寓居河側時值荷花盛開招余月下泛舟縱酒爲樂今三十餘年矣香海已謝世撫今思之不勝慨然

老作貴游客今從此地陪一溪楊柳絕半畝藕花開沙

鳥偶翔集遊人時往來頗嗟風景異令我意低徊

行入招提境同登歡喜場

廊舍有耆將軍書歡喜地區額

僧閑迎客懶

佛靜看人忙老樹尙偃寺小松初過牆縱教熱場客到此亦清涼

讀邸抄輓曾太傅四首

將星驚落兩江頭我是蒼生亦淚流百戰功高能滅賊  
九重恩重特封侯先朝早識名臣選元老翻從

內翰求若與汾陽論勲業也應史筆讓千秋

經略江南十數春提兵掃蕩粵妖塵匡扶社稷無雙士  
旋轉乾坤第一人四海頓成安樂土萬方都作太平民  
共邀再造中興福天地應留不老臣

江山幸賴偉人扶搜取人才出兩湖草澤英雄皆將略

九梅村詩集

卷十八

六

朝廷駕馭盡兵符盛名自足垂千古薄議何妨聽衆

儒本爲國家全大局誰知仰體

廟堂謨

天津之役  
湖南諸紳

士有譏其不能雪憤者

萬里軍門遠莫尋聞名早動瓣香忱未瞻山斗常私恨

雖隔雲泥亦痛心到此方知人物大在生久荷聖明

欽草茅寒賤彝良具也感忠誠涕泣吟

贈清捷亭

凱

都護竝酬招飲

世胄天潢衍胸懷將略儲肘懸都護印庭列右軍書

收藏

古人法帖最夥

折節能忘勢聞名轉顧余殷勤問揮翰好學太

心虛

公最嗜作書

雅有臨池癖功深學劍加彎弓能射虎運筆更驚蛇草

聖稱懷素

墨禪上人  
工草書

庸書愛魏華

公因謬愛  
拙書訂交

風流儒雅

度不似絳侯家

別院開幽境居然隔市塵鹿馴常見客鶴傲不迎人

園畜

一鹿圍占羣芳勝門垂十柳新

園有十柳皆公手植  
名其臺曰十柳書屋

我

來挹清蔭何幸接芳鄰

早有飛觴約不容辭綺筵能招文士飲頗愛主人賢鴻

爪聚今日

竝招李虎臣防  
禦墨禪上人

龍華知宿緣新秋正風雨同

醉畫堂前

松雲聘女賦詩寄賀

門闌喜氣說乘龍節近中秋好月逢

八月十三日

有女如珠

郎似玉跨鸞飛繞丈人峰

招贅甯遠

佳期天上已經過漫說黃姑渡絳河羅隱有詩堪借贈

定知青桂近嫦娥

老劉夢得本工詩況得風流快婿時不似揚州王刺史

惹他嬌客笑翁癡

女似相如壻右軍東牀妙選本超羣滿城士女爭誇羨

不獨英雄是使君

野望

雨過碧天迴晚來秋氣涼遠山屯暮靄高樹戀斜陽征



鴈斷行去歸鴉分陣翔遙聞有漁唱疑是在滄浪

秋末書懷

秋風生木末萬葉一齊飛天冷雁還度秋深入未歸書  
知前月到賊聽故園稀道路方通旅經寒盼寄衣

夜晴獨坐

開門秋氣厲雲色黑冥冥一陣雨過夜半天晴漏星鐘  
聲度城緩燈火向人熒更漏長如許遲眠我獨醒

寓懷四首

已無功業著學問亦須嫻名不滿天下生虛來世間詩  
人如李杜畫史若荆關猶自傳千古高風不可攀

不能猗頓富豈可范丹貧但有中人產堪資八口身生  
兒是才子得友盡詩人如此方娛樂何須作貴臣  
軒冕非吾分幽棲甘寂寥不遭離亂世終值聖明朝  
妻子朝朝聚田園歲歲饒林泉穩高卧隨意事漁樵  
敢望彭鏗壽還期享百年孫曾皆繞膝夫婦共華顛小  
占人間福羣稱世上仙未知彼蒼意可許此因緣

書感

白首無能謁帝閭久甘耕鑿隱邱園貧居草莽人皆  
賤老入侯門客亦尊末路英雄聊自慰舊時朋輩復誰  
存燈前偶爾捫心憶棖觸孤懷墮淚痕

幕居詠懷

自賦閑居十二春被風吹出薜蘿身  
輞川徒效王摩詰  
谷口虛傳鄭子真  
萬里乾坤消戰伐  
百年書劍老風塵  
自慚不稱龍門客  
養拙終當覓舊鄰

野雲不合伴公卿  
爭及閒鷗問故盟  
知己恩從貧裏見  
好名心到老來輕  
一溪烟水猶堪釣  
二頃山田尚可耕  
每念兒孫娛目樂  
阿誰人壽俟河清

寫意

半類風狂半類癡  
此翁踪跡自家知  
吟詩偶有賞心處  
作字終非愜意時  
書未讀完忘已盡  
事經錯後悔常遲

天生廢質原無用微倖休將遇合期

燈下獨坐有悟率成

歲月催人疾雙丸擲太忙不飢貧亦可無死者何妨富  
貴邯鄲夢悲歡傀儡場達觀有微旨吾欲問蒙莊

天地有時盡滄桑亦變遷古今一俄頃人壽幾何年歷  
劫疑存佛長生妄學仙只須空色裏到處且隨緣

紅塵一羅網打盡衆生來名利途紛出死生心未灰現  
身皆若海何處有蓬萊彼岸分明是誰人首肯回  
前因與後果荒渺固難知今世旣如此他生安可期羣  
居觀我處清夜問心時但盡爲人道何須天命疑

孽緣由自作禍福本無門試看居高位應知多善根再  
能修果報自有好兒孫天道原無爽休將憤憤論  
愚人不信數念念總貪癡飲啄且前定窮通豈誤施恃  
才多妄作矯命每徒爲到得臨頭日方知悔已遲

偶書絕句

落花藩溷各前因都是隨風蕩墮人誰帶靈根終不昧  
來時明白去時真

前世焉知我是誰無名無姓渺難追今生我既知爲我  
未必來生我自知

我亦微塵大衆生衆生有我欠分明雖非造物留心處

也向人間有姓名

萬古鴻濛世界開  
生生不斷有人來  
世間最是爲人樂  
問我曾來第幾回

世人也有記三生  
不入輪迴六道城  
生死關頭自來去  
教人究竟不分明

妻子兒孫聚一門  
無端來作一家人  
前生究竟爲誰氏  
底事都成骨肉親

容易旁人認是誰  
自家面目總難知  
有時對鏡留心記  
閉目何曾彷彿時

一墮紅塵失本真  
天生兩眼看羣倫  
某人像某都能識

獨不能知像我人

前生狀貌不能知今世依然恍惚時再到來生更面目  
不知妍醜又如誰

本來面目是孩提一自成人性便滴清夜偶然尋故我  
茫茫那有再逢時

前世兒孫問有無輪迴一隔竟糊塗縱然念我隨時祭  
魂已無靈骨已枯

蒂結情天慾海胎本非淨土送生來貪瞋癡愛如羅網  
萬古英雄打不開

佛氏因緣兩字真有緣便識有前因請看貴賤論交日

或是龍華一會人

朋友妻孥盡是緣相親相愛更相憐有時緣盡恩情斷  
絕不相關兩漠然

偶然一見便相親竟有常逢似路人欲問此情作何解  
種緣深淺在前因

寒夜獨坐

樓頭鐘亦凍不聽遠聲傳臘近雪連日夜寒星滿天挑  
燈人獨坐續炭茗重煎絕似枯僧意蕭然默悟禪



九梅村詩集卷十九

鐵嶺魏變均公隱甫編

西曹幕吟草

癸酉

宛平劉 杞松雲選訂

上元月夜有懷甘泉蕉園二君淒然感賦

山村元夜看燈懸賸我衰翁獨悵然好月又圓逢此夕

故人相憶別多年寒溪踏雪鐘聲裏

昔二君寄余家度歲嘗於是夕同踏

雪溪上徘徊望月

老屋吟詩燭影邊

蕉園嘗與余剪燭分韻賦詩

回首當時

已如夢那堪生死隔人天

時甘泉老歸里門蕉園已謝世數年爲之悵然

將之瀋陽留別故園

晨興備車馬駕言發故鄉兒女治離筵奔走羅酒漿老

妻慘不樂無語坐中堂小孫牽我裾大孫牽我裳依依  
繞膝下問我之何方我言非遠行去去潘之陽攜將琴  
與書爲汝謀稻粱黃金載歸來可以充飢腸孫言祖臘  
高不似昔康強何如守門戶課讀兼耕桑我聞兩孫言  
中懷惻以傷忍涕不敢墮且自理行裝

行裝已在輿欲去猶徬徨丈夫久爲客老矣情何長慨  
然出門去登車辭故鄉家人送我行行遠猶相望我兒  
獨隨侍旅館護風霜我僕健相從長路戒跳梁冰雪載  
道途春風尙嚴涼吹我賦南征車馬何倉皇人生苦行  
役況復鬢髮蒼安得脫風塵永謝馳驅忙蹤跡感浮雲

光陰悲夕陽回首望故山百里殊茫茫

別後寄文瀾

到家剛慶隔年歡又逐春風上客轍老友無多思轉甚  
故鄉雖近別猶難漸疎骨肉畏僮僕誰問興居慰煖寒  
衰體恐懸兒女意寄書月月說平安

得松雲書偶題

隔年不見倍相思每寄音書便寄詩昨接劉昆有來信  
待逢三月艷陽時

憶昔騷壇數冠軍風流回首盡烟雲吳郎已遠王郎死

朕有英雄劉使君

謂吳桐雲王  
拓園二君

又得雲中一尺書  
書中字字說思余  
獨憐魏野公然在  
深感多情問起居

幕中書懷

出山已老入山遲  
欲問歸期未有期  
故友恩深徒說報  
主人情重敢言辭  
士逢知己甘爲用  
交到忘形便不疑  
自愧侯生年已暮  
未能附驥効驅馳

閑居雜述

白雲紅葉小山莊  
一卧林泉歲月長  
酒債未酬詩債積  
硯田已廢石田荒  
舊書忘盡餘空腹  
老友交深有熱腸  
餘却往還數知己  
更無相對說滄桑

置身無分到青雲早把君苗筆硯焚除解吟詩無別好  
愛聽說鬼當新聞老將入社師摩詰閒且臨池學右軍  
自悔看花情太重風懷則盡杜司勳

偶從清夜問生平事半因人竟不成夢亦有時徵禍福  
年將垂老厭功名不求季路先知死欲學莊周善養生  
眼盼諸孫皆長大可能勤讀與躬耕

英雄千古盡蹉跎看破塵寰似網羅名利陷人皆苦海  
文章如我等恒河愛才尙覺癡情累仗義從來俠骨多  
賸有此心對親友依然結習未銷磨

最幸遭逢是 聖明無才濟世愧虛生百年歲月荒唐

過四海干戈次第平賴有薄田供自給尙憂空谷受餘

驚

時有盜賊  
滋擾鄉間

每期撫字循良吏愛我蒸黎若子情

枕上口占二絕

吟詩未就息燈光枕畔凝思夜漏長幾字推敲猶未穩  
沈沈翻入黑甜鄉

夢裏猶吟是故吾分明得句不模糊醒來伏枕從頭憶  
漸次全忘一字無

劉伯倫

出行荷鍤總相隨沉湎襟懷世莫知漫道先生常爛醉  
婦言不聽是醒時

寄贈松雲刺史

不作詩人作宰官  
詩人容易宰官難  
循聲要使蒼生頌  
政績應留史冊看  
君是劉昆能治獄  
我非貢禹亦彈冠  
故人珍重無他意  
仍望清風兩袖寒

劉寵官聲不愛錢  
從來渴不飲貪泉  
公卿久識君侯潔  
父老爭誇刺史賢  
求友如斯當世少  
此翁何必藉詩傳  
端州風節蘇州骨  
累我相思已十年

寄懷家子循十絕

去年九月寄雙魚  
隔歲曾無得報書  
我似舊時王謝燕  
春來仍覓故巢居

安仁已老鬢全斑正好幽棲學賦閒祇爲主人情太重  
片雲未忍遽還山

迢迢南北各離羣每向天涯悵暮雲孤館殘燈風雨夜  
斷鴻聲裏又思君

營營一樣嘆勞生白髮催人歲月更君守田園我爲客  
暮年兄弟最關情

昔年意氣頗縱橫走馬春風竝轡行迴首不堪追往事

杏園花發正聞鶯

杏園子循之別墅也

歡場一散似雲煙猶記追歡十九年魏佑尙存常建死

風流何忍說寒泉

昔職卿設帳於寒泉寺余與子循偕訪作林泉之游今職卿已歸道山風



流雲散矣  
爲之惓然

其向營川作勝游瀟瀟風雨過中秋水天無際孤帆遠

惆悵同登望海樓

時送鄭玉叔之天津

幾度尋春杜牧狂煙花過眼感滄桑詩人老大風懷減  
無復多情問鼎娘

客路重逢喜欲顛于今不見又三年迴車翻悔匆匆過

從此相思各惓然

辛未歲杪由岫岩北旋時以道梗爲虞匆匆過境未獲把晤爲之惓然

身如匏繫客侯門舊雨關懷最愴魂爲報故人劉夢得

依然枚叟在梁園

謂劉耆軒友人

遲松雲不至

三月得書信知君三月來如何人不至空見雁飛回日  
暮碧雲合春風芳草催何當快良覩共覆掌中杯

雜述

眼界曾無萬里開每傷倦翮困蒿萊名山笑我一雙屐  
好酒醉人三兩杯自分黃金無日至漸看白髮滿頭摧  
平生賴有詩盈篋不算虛生此世來

高歌難動鬼神顛餓死無憂溝壑填有福敢期應我受  
無才何必要人憐已知榮辱皆猶末轉覺聰明不似前  
且養餘年除罍礙飢來喫飯倦時眠

紀夢寄懷松雲

有序

三月十九日夜夢松雲賦詩一絕云寒食無人  
酌綠醅桃花爭向臉邊開瓶中原有舊藏酒更  
向明朝共舉杯次句自謂引用古人三月桃花  
酒一杯之句然不知是何人詩也旣而醒惟恐  
遺忘遂於枕上反覆沉吟忽復睡去又夢與松  
雲遇衣冠而來余喜曰適夢君得一絕未知果  
出尊作否余爲誦之松雲笑而去明日因愛三  
月桃花酒一杯句足成二律用回環疊韻之體  
以寄懷云

拋棄田園長草萊風光隨處自徘徊十年萍梗詩千首

三月桃花酒一杯白髮滿頭悲我老紅塵笑口向誰開  
懷君更望遼西月竟照吟魂夢裏來

夢裏逢君兩度來夢中說夢笑顏開五更蕉鹿人千里  
三月桃花酒一杯詩到醒時猶記憶情從幻境且低徊  
相思無賴深如許尙待羊求徑剪萊

甘泉已老復游遼左喜賦二章

千里其衰白素心難冀傾縱敎出關塞未必得逢迎

前二

年出關滯留甯遠未肯東來

天地留吾輩風塵老此生那知尙能聚

悲喜不勝情

君年七十四已過古稀春我亦六十二居然強健身有

情俱得壽不死或因貧憶昔同遊輩寥寥賸幾人

客中書懷四首

中年已悔入山遲老卧林泉又別離百歲人情都閱盡  
一生客味最深知已無清福聊安命早得狂名賴有詩  
念昔貧居愁裏過窮途多仗友生時

何須慷慨憤時鳴一到殘年氣自平酒量淺宜隨意酌  
詩名老不與人爭較量恩怨猶多事學作慈悲最有情  
悟得行雲流水意便知泡影是浮生

人生不怕老來飢天道茫茫有報施試看獨操奇節處  
何曾孤負苦心時莫因衰病先憂死要絕貪嗔並去癡

一任無心聽造物不須祈福拜牟尼

六十初過號陋翁行藏甘與鄙夫同不宜笑傲公卿側  
自合追隨釣隱中妄冀彭殤齊壽考且將蠻觸笑英雄  
他年遁跡紅塵外不願人間知所終

示庚兒

莫厭田家碌碌翁由來衣食靠天公才非經濟休謀祿  
運或艱難且耐窮但得平安皆福命能行小善亦陰功  
子孫須要栽培厚莫失傳家耕讀風

贈甘泉老友四首

自憐野鶴尙精神笑入侯門已六旬風雅謬當名士目

乾坤容得腐儒身酒徒零落無知己

謂王蕉園吳仲培

詞客蕭

條賸幾人

謂傅味琴吳桐雲王拓園常職卿諸君

惟我與君猶健在關河

迢遞且能親

七十餘齡白髮翁依然賣畫走遼東興超湖海疏狂外

名在公卿賞識中已附詩編傳姓字

樂亭史香崖孝廉輯刻永平詩存採

錄君詩若干首

每施方術奏神功

君嘗以符咒療病輒奇效

平生好誦菩提

偈一片慈悲與佛同

心餘罣礙總難忘猶向風塵蹀躞忙不念春秋爲日短

尙牽兒女太情長家山又別千餘里書畫應存數百張

好作子孫他日計飢來可換救貧糧

貧賤相交四十年兩翁矍鑠似神仙關心師弟長離別  
聞奎文漁亦謝世文漁爲余弟子亦稱甘泉爲師到眼滄桑幾變遷君合早歸  
辭客路我將高卧隱林泉共須頤養烟霞壽莫再勞生  
向硯田

荅王賡棠少尉

垂老還歌出塞行

庚午調補昌圖

繁霜兩鬢已全生不妨大耋

歸高隱自有佳兒繼令名

令嗣幼賡現官司馬

藥爲延年宜手種

秫堪釀酒待躬耕閑居歲月憑何遣抱膝長吟答

聖明

我亦田間力穡翁行將歸隱效盧鴻青山無恙做廬在



白髮如斯春夢空，尙幸妻衰偕到老。  
喜看孫長漸成童，與君共享桑榆樂。  
且祝修齡兩地同。

夜起偶成

參橫斗轉夜沈沈，起視空庭露氣深。  
涼月在天清似水，四鄰無語一蟲吟。

李湘浦

鴻賓

見贈依韻奉答

萍踪一散聚無因，翻喜他鄉遇故人。  
客子光陰容易老，書生習氣本來貧。  
好談風雅吟能妙，久別音容記不真。  
今日相逢猶落拓，惜君生就不逢辰。

李小南

大鵬

明經遷居小河堰

秋高日淨小河邊聞道詩人卜地遷  
居近荷花香世界也呼君是李青蓮

水雲深處閉閒門風鶴無驚靜客魂  
我是武陵老漁父

放舟直訪到仙源

小南本鄉居因盜警遂遷居省城又號仙源子

中秋有感二絕

今宵又見月當頭忽感年華似水流  
自入山人亦老  
綏經二十六中秋

昔年堂上老親存每值中秋獻酒樽  
今我作翁逢令節團圓相慶有兒孫

九日小南招飲初開詩社卽呈同社諸君子

辛喜重陽風雨無登高復擾藕鄉廚藕鄉詩社名也小南因卜居小河堰

稱爲藕鄉主人社中又得新詩友謂王夢琴副車寶會卿孝廉王上之秀才高聲竹太學李

湘浦座上難招舊酒徒是日招王雪樵不至此會明年應共健大

家今日且相娛狂吟半是青年輩慙愧袁安與魏扶社中

惟余與甘泉年最長

### 寄松雲

經年離別阻輪蹄每憶飛鴻印雪泥漫道相思枉惆悵

夢魂長渡大遼西

獨抱瑤琴古調彈老劉遠隔賞音難乾坤如許詩人少

更憶當年王子安謂折園

閑雲出岫復何心兩鬢蒼蒼白髮侵六十二年窮未退  
那容措大有黃金

可憐君亦鬢毛斑宦海風恬待引還莫忘林泉歸隱樂  
故鄉一片好青山

冬日送甘泉歸樂亭

七十走天涯言旋登客車途長孫作僕

令孫來奉迎歸

日暮店

爲家驛樹無風葉關山見雪花天寒行旅苦珍重老年

華

共結吟壇好離筵轉愴神一杯同社酒千里異鄉人

前一

日王上之約同社諸人爲甘泉作饌

我嘆朱門老君憐白首貧故園兒女

樂慎勿戀風塵

西入幽燕道知君過柳城寄言劉夢得

謂松雲

勿念魏端

明山海重關路風霜半月程到家見老史須說社中名

謂史香

崖孝廉

### 夢人彈琴

平生愛古調鍾子杳難尋有客入幽夢向人彈素琴依  
稀終一曲彷彿得同心訴罷高山志猶餘枕畔音

### 捷亭副帥生子已彌月矣再蒙招飲賦詩奉酬

戟門喜氣暖如春又值華筵列鼎珍滿座簪纓皆貴客  
登堂蘿薜一山人饌催屢進忙僮僕酒到初酣忘主賓

醉後祝公介眉壽笑看他日小麒麟

臘日送王夢琴小舫兄弟歸岫巖

去國共爲客嗟哉兄弟貧正當寒臘日同作遠歸人出

郭見殘雪到家逢早春

臘月十八立春

明年隨雁返切莫厭風

塵

我客岫巖日頗知山水奇君家隱於此伯仲各工詩負  
米作勞子還鄉當抱兒高堂見應笑頓慰倚閭思

九梅村詩集卷二十

鐵嶺魏燮均公隱甫編

西曹幕吟草

甲戌

宛平劉

杞松雲選訂

送友人張子笏

縉

之官江南

丈夫懷遠志慷慨別遼東從此一揮手長乘萬里風過  
江山色綠沿路杏花紅還訂南游約他年駕短篷

題王拓園閱莒草堂遺草

展卷無端意黯然玉樓歸去賸遺編若論造詣堪千古

再使長吟假十年家學淵源能繼世

令先伯別駕公先尊理問公皆工詩

風懷瀟灑本如仙天生一種奇才筆來結人間翰墨緣

才大官卑命不猶苦吟直到死方休聰明合帶前生慧  
貧病兼忘此世愁不肯與人矜一字常懷下筆有千秋  
少陵風格坡仙派取法還爭最上流

遼海爭傳王子安一時名重冠騷壇出關詩帶邊聲壯  
玩世人驚傲骨寒自合鄒枚爲上客那堪屈宋作衙官  
當年把臂稱知己獨向風塵識魏桓

眼界曾經萬里開吟懷浩蕩亦雄哉豪情更得江山助  
妙語都從心血來袁淑讓卿稱獨秀陸機出世本天才  
頓教筆硯甘焚卻愧我君苗志已灰

蒐輯殘編付棗梨平生風雅及門知

謂鼎臣同寇

斯人若在



空前輩此集能傳勝有兒尙記劈牋酬唱日久經封篋

祕藏時

余藏共遺草十餘年

而今幸免琴亡恨足使幽光發陸離

### 清捷亭都護招飲

戟門時往還相見便開顏賞識風塵外言歡杯酒間客

常陪入座僧不許歸山愧我無由報侯生鬢已斑

公每宴客

必招余飲並墨禪上人上人每入城公必苦留之

邵玉亭

汝南

布衣招余同王梅村

聿修

蓮賓上人

偕游太平寺

寺在瀋陽城北

故人有清興招我出城游勝侶偕王洽

梅村工畫

高僧約惠

休日無炎暑逼雲恰淡陰浮更喜清風送披襟爽似秋

少壯健能履相隨車馬行樹深白塔見野濶綠蕪平積  
水遙分浦危樓半隱城偶來人境外心目豁然清

玉亭知余

與梅村艱於遠涉爲覓車  
代步而已與蓮賓徒行焉

漸近招提境而無塵俗喧到門僧亦熟慢客佛常尊精

舍花當砌空廊風入軒清涼小世界坐久滌襟煩

共訪花卿去

北陵總管  
花春亭尙阿

冥冥天更陰雲飛西塔沒雨

到北陵深雖阻暢游興已娛閑曠心詩人居在邇荷

笠且相尋

時李湘浦設  
館於陵堡

歸院具齋饌僧開香積廚達官還送酒

春亭送酒

野客喜傾

壺又得浮生暇聊爲盡日娛不妨成爛醉蓮社有狂徒

雲際夕陽落輕陰猶未晴野煙沉遠寺暝色入高城遂  
與禪關別還尋歸路行又投塵網去終愧學無生

七月初五日夢中作

百尺危欄盡日凭新秋天氣雨餘澄愛看山色青如畫  
歷徧江樓上下層

七夕大雨

除卻英雄淚今宵不肯流星河千里黯風雨萬家秋客  
近猶傷別年衰亦動愁豪門正歌舞應未解離憂

寄甘泉甯遠

浪遊遼水各西東白髮依然類轉蓬兩地客悲貧賤裏

百年人老別離中夜當風雨驚書至路隔雲山有夢通  
聞道使君能愛客免教阮籍泣途窮

時依松雲  
刺史署中

雨夜書懷

未忍歌彈鋏猶爲入幕賓秋窗黃葉雨夜燭白頭人苦  
與田園別多憐兒女貧也應念衰老仁望謝風塵

客途早行

滿地霜華五夜濃深秋又向旅途逢烏啼古樹落殘月  
雞鳴遠村鳴曉鐘隔水漸聞人語響過橋初辨馬蹄蹤  
平生此苦曾經慣憔悴風塵老客容

得張子笏書二首

春風吹別離別後總相思回憶宦游日正逢花落時路  
經過海遠書盼到秋遲今始通音問欣然手自披  
念我猶通訊憐君知者稀備言風土異漸悔宦情非妻  
子貧難給家山老欲歸覽書三嘆息秋鴈正南飛

秋夜幕齋別友人

老至猶爲客相看白髮新深秋風雨夜孤館別離人古  
道世不悅斯文誰更親知君終寡合歸守故園春

秋夜懷友人

啟戶見星斗今宵風雨晴疎鐘來幕府孤鴈過高城爲  
客三更夢懷人萬里情那堪正蕭索落葉作秋聲

謝李小南社友贈菊竝懷同社諸君子

去年結社共吟詩正是重陽賞菊時  
今歲人分詩社散偶因贈菊動相思

詩人零落各天涯剩有秋容淡不華  
安得藕鄉重聚首大家把酒看黃花

知君念舊亦多情未免離懷感慨生  
愛我吟詩淡如菊特分秋色與淵明

與君晚節獨相親無復羣賢續舊因  
坐對寒花感知已白頭賸我兩詩人

九日同邵玉亭王梅村再游太平寺登觀音閣

古寺舊游處重陽約再游今朝宜遠眺此地有高樓野  
曠天光迴陵深樹色秋憑欄正遙矚飛雁過當頭  
不赴茱萸會難忘客子心秋風吹短髮寒磬散空林遠  
塔逢晴出孤城入望深龍山有同侶誰識此登臨

九月十五日雪中書懷

北風吹送鴈行斜不聽高城奏暮笳九月天寒初見雪  
一庭秋盡已無花身經久客思鄉土人過中年感歲華  
恨我蒼蒼鬢如鶴那堪淹滯尙天涯

贈華梅莊

長卿廣文

久別喜良覿驚看皓髮新殘年猶薄宦此老是詩人

聯年

六十有集能傳世著有梅莊詩鈔行於世無緣得結鄰嗟余貧病

裏且作幕中賓

答友人喬椿溪有年主事寄書

故人在京國遙寄數行書濶別久經歲多情猶念余關  
河千里鴈風雪九秋廬我亦殘年客相思託鯉魚

送孫曉帆殷秋歸海南

四載久爲客高堂念老親鄉山隔滄海風雪送歸人與  
我別離苦憐君兄弟貧明年挂帆早須及柳條春

曉帆臨別再賦二首贈之

策馬青石關

取道蓋平

歸心獨浩然路辭遼左郡人上海南



船夜迴帆隨月天晴島見煙

由小平島買舟渡海

蓬萊應在望此

去勝登仙

征途寒尚薄十月小陽回客向登州返詩隨渡海來親  
朋爭問訛歲月幾徘徊更慰倚閭望承歡進壽杯

題李湘浦賞心齋詩卷

雲海雙蓬鬢乾坤一布衣故鄉垂老別窮路幾時歸吾  
道謀生拙當途知己稀獨餘賞心處高詠興無違

一卷詩成集平生能苦吟風塵斯客少寢饋古人深絕  
調香山格多情杜牧心才華不可掩終竟有知音

憶昔論交日於今二十年相逢在客路投贈有詩篇已

羨才殊衆曾誇句若仙那知久別後更似李青蓮  
去歲開詩社重陽得九人與盟風雅盛獨見性情真曠  
達胸無物淋漓筆有神自應傳不朽名噪百千春

喜馬西岡見訪留飲

久別不知老相逢鬢雪新故交餘我輩舊識幾詩人戎  
馬驚時變田園守業貧聊傾一杯酒藉敘十年親

寄懷社友王上之

梯青

客游吉林

去年結社共吟詩今歲星分絕塞馳五月薰風吹客去  
九秋鴻鴈盼書遲文章有遇窮應救兄弟相逢遠莫知  
上之出塞賣料得故人遙憶我松花江上月明時

文廷尋其弟

寄答喬椿溪竝言懷四首

寄書千里外索我舊吟詩  
知已此中少與君何處期  
青雲看日下白首悵天涯  
徒令勞魂夢悠悠繫遠思

愧比鄒枚叟梁園作上賓  
那知良友意猶念故人貧

余初

就司寇之幕椿溪早爲說項

情重此生感交深  
吾道親自慚日衰老

早晚謝風塵

尙賴謀溫飽山田薄可耕  
兒孫娛晚景泉壑養殘生  
得壽期安樂無心問利名  
只愁多寇擾風鶴不時驚

終望朝廷福能清  
伏莽塵不聞離亂事  
願作太平民歡飲逢春社  
賡歌在野臣從茲安衽席  
高卧百年身

述懷

頭顱如雪髮鬢鬢虛度年華六十三詩不驚人還自賞  
友無知己向誰談愁來佞佛思除妄老去傷貧未戒貪  
名利不成徒碌碌愧他王適是奇男

寄答張震候

旭東處士

莫謂年將老拈吟悔已遲在唐高記室五十始工詩但  
肯嘔心血不憐摧髮絲自能得三昧況有雅才思

念我耽風雅於今五十年未能得丹訣自愧已華顛好  
學尙無厭爲詩期必傳與君幸同調努力聳吟肩

客中秋思

皓首青山別高吟興轉違久荒才已盡垂老病全歸事  
悔因人誤情知作客非故園秋正熟忽念卧岩扉

雪後寒甚夜坐遣興

萬家城郭夜雪後白茫茫天地有寒色星辰無皓光月  
遲應畏冷樹凍轉疑僵惟有高齋客孤吟興復狂

野望聞警有感

高城慘淡下斜暉野老傷心淚欲紛日照河山連白雪  
地臨邊塞接黃雲頻年寇警何由息近日軍書不可聞  
太息蒼生罹浩劫蕩平還望霍將軍

寄懷家子循四弟

惜別家山日羈留幕府身殘年猶作客獨夜每懷人念  
我風塵久惟君骨肉親相思各遲暮不得往來頻

自悔淪孤寂誰堪慰別離相違居地遠長恨得書遲憶  
舊渾如夢消愁但賦詩平生最情重諒爾亦應知

捷亭都護招飲

論交忘貴賤相契亦前因愛我殊常客推恩當故人禮  
叨賓末重話敘酒邊親感謝憐才意能詩說茂秦

端居

端居靜室獨徘徊也復腸回九轉來立世未嘗無大志  
能詩究不算奇才乾坤俯仰人千古歲月消磨酒一杯

頭白身衰傷已老自應歸剪故園萊

惜老

流光誰挽魯陽戈千古英雄奈老何好學已知來日少  
健忘翻比去年多彈冠縱使心猶熱攬鏡其如髮已皤  
快作及時行樂計自沽村酒唱山歌

喜海城劉耆軒

蔭椿

友人見訪

臨瀛一揮手轉瞬九年間今日相逢處閑雲又出山自  
嗟身世累同嘆髮毛斑邂逅風塵裏傾懷解笑顏  
往事渾如夢何堪說舊游偶尋公府幕招上酒家樓且  
盡樽前樂翻消別後愁烽烟今未息不必論公侯

猶記昔年別臨歧意有餘相思隔山岳不斷寄音書今  
幸得歡會余將歸里閭明年應復見分袂莫躊躇

早發

荒雞村店鳴早起帶霜行寒月馬頭落冷風人面生  
餘歸故里道上度殘更獨惜衰年客勞勞尙旅程



閭山游草跋

龍二為云吾游西湖屢矣不賦詩無以謝山水必賦詩又無如此習見習聞何吾當俟吾性情之所至耳余嘗深韙其言及讀子亨明經閭山游草益信二為之言不余欺而鄙見為不謬也憶癸丑夏余嘗陪張振之學使登閭山觀音閣呼僧瀹茗徜徉於石棚下低徊而不忍去顧乃無一言以吐其胸中之所得豈非以冠蓋喧闐雖山靈亦不能使

之靜耶不然子亨搜奇抉奧淵然作金石聲而余  
并習見習聞亦不可得人才雖相越不應如是之  
甚蓋性情有至有不至也類如此雖然閭山名雄  
北鎮子亨才轢東都其性情相感發宜也乃近依  
桑梓亦若有悲從中來而不能自己者何哉讀子  
亨詩益不禁念行邁之悠悠愴然而涕下矣爰綴  
數語以遺子亨不知子亨視余與二為何如也

咸豐甲寅中秋後四日沅陵桐雲弟吳大廷拜跋

先生是集精澂博大奧  
衍宏源涵泳乎雅頌之  
源出入於風騷之病雅景  
則河海無量也撞懷則雲  
兮光風起事則手扶之

身出物已尊泰造化証  
三生之慧業知君明月  
市身經旨之獨天探象  
似蓬瓦斗伏強

國朝人文星爰訪學日

隆嘉起漢彩遠駕手  
三唐南宋風雲之露  
偏明香七季六朝況乎  
中錦城春鼓鐘餘浮遠  
海煙霞之地代有佛人

即枚稿墨一林更爲心  
在

先生少游福寺秀跡  
銀窗子益就錦新馳  
幕病身寄如姑子日

披來福地王公目過縹緲  
數行啼盡人皆之李尔乃  
弱魯多之嘆何如身位  
偶場中看來冷眼骨  
鍾之而水錄心曉成以

曉汲宜其葉蒲星鉞  
思標之若步驅風濤於  
上麗法果於毫端奇然  
古色古香久矣詩家詩  
史當其名山詩稿高館



九悔阿詩集

上二層未可謂小坐脚  
地質之持石耳

甲戌旦月宗晚象書  
坪氏謹跋於憲平西邸  
惜其陰焉